



SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

GODINA: XII

BROJ: 197

DATUM: 20.02.2015.GODINE



Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja
fax: + 387 33 552 810
dzenita@sogfbih.ba

Sadržaj biltena:

CIK objavio rezultate izbora za Općinu Domaljevac - Šamac

1

Grad Bihać osigurao više od 700.000 KM za podršku privredi

1

Predstavljen elektronski registar administrativnih postupaka u Općini Ilidža

2

Služba za prostorno uređenje Općine Ilidža riješila 1.869 upravnih postupaka

2

Intervju: Agan Bunić, načelnik Općine Bužim

3

Općina Scandicci i Jablanica zajedno u projektu "Rad je moje pravo"

5

Općina B.Petrovac u IPA CBC Projektu Alterenergy

6

Potpisan sporazum o revitalizaciji stare "Ćirine" pruge

6

Predstavljen projekt MOSLED Općine Orašje kojeg financira EU

7

Predstavnik Saudijskog fonda najavili odobravanje kredita

7

Uspješno završen certifikacijski audit u administraciji Općine Srebrenik

8

NAJAVA obilježavanja dana općina za mjesec mart / ožujak

8

Bilten Saveza općina i gradova Federacije Bosne i Hercegovine

CIK OBJAVIO REZULTATE IZBORA ZA OPĆINU DOMALJEVAC – ŠAMAC

SARAJEVO, 10. februar/veljača – Centralna izborna komisija BiH danas je utvrdila rezultate prijevremenih izbora za načelnika Općine Domaljevac – Šamac održanih 01.02.2015. godine.

Prema utvrđenim i objavljenim rezultatima građani općine Domaljevac-Šamac za Načelnika svoje općine izabrali su Maria Jurkića (HDZ 1990).

Prema izvještaju Centralne izborne komisije, Mario Jurkić dobio je ukupno 1.185 glasova ili 58,96% a kandidat HDZBiH Mato Prgomet 825 glasova ili 41,04%.

Na prijevremenim izborima za načelnika Općine Domaljevac - Šamac glasovalo je ukupno 2.037 birača, od čega je 2.010 važećih, a 27 nevažećih glasova (8 praznih i 19 nevažećih glasačkih listića po ostalim kategorijama).



**Mario Jurkić, načelnik Općine
Domaljevac - Šamac**

GRAD BIHAĆ OSIGURAO VIŠE OD 700.000 KM ZA PODRŠKU PRIVREDI



BIHAĆ, 16. februar/veljača – Program poticaja privredi za 2015. godinu, koji je razmatran na zadnjoj sjednici Gradskog vijeća Bihać, dobio je suglasnost vijećnika. Na ovaj način grad Bihać nastoji razvijati lokalnu ekonomiju s ciljem povećanja zaposlenosti, kao i doprinijeti rastu investiranja te općenito razvoju poduzetničke svijesti među mladim i nezaposlenim osobama, navodi se na web stranici Grada Bihaća.

U budžetu Grada Bihaća za ove namjene je planirano 740.985 KM od čega je za generalne poticaje, turizam i poduzetništvo predviđeno 261.346 KM. Sredstva za poticaje razvoja privrede mogu ostvariti fizička i pravna lica koja registriraju djelatnost na području grada Bihaća u Službi za opću upravu, privredne i društvene djelatnosti ili kao društvo sa ograničenom odgovornošću u Općinskom sudu Bihać i to za 2015. godinu. Svrha programa je povećati broj i održivost obrtničkih radnji i poduzeća, povećati razvoj poduzetničke svijesti među mladim i nezaposlenim ljudima, povećati broj zaposlenih osoba i obim investicija, te doprinijeti razvoju ukupne lokalne ekonomije.

Sredstva Programa poticaja privredi za 2015. godinu namijenjena su za sufinanciranje kamatne stope poduzetnicima grada Bihaća, refundaciju troškova osnivanja obrtničkih radnji (osim trgovina i ugostiteljskih radnji) i dijela troškova osnivanja poduzeća u 2015. godini, realizaciju projekta „Pokreni svoj posao u Bihaću“, sufinanciranje dijela troškova zakupa poslovnog prostora obrtničkim radnjama (osim trgovina i ugostiteljskih radnji), i poduzeća – d.o.o. koji registriraju djelatnost i firmu na području grada Bihaća, sufinanciranje rješavanja imovinskih odnosa privrednih subjekata za razvojne projekte, sufinanciranje dokvalifikacije, prekvalifikacije i stručnog usavršavanja i osposobljavanja kadrova za zapošljavanje u proizvodnom sektoru, sufinanciranje razvojnih projekata poduzetništva u zoni Nacionalnog parka „Una“, sufinanciranje zapošljavanja pripravnika – volontera u realni sektor, učešća privrednika grada Bihaća na privrednim manifestacijama, sufinanciranje promocije starih tradicionalnih zanata, sufinanciranje promotivno-privrednih manifestacija (Zlatne ruke grada Bišća, Trahanijada, Festival folklora Dijaspore...), sufinanciranje projekta „Turistički voz NP Una“.



Grb Općine Ilidža

PREDSTAVLJEN ELEKTRONSKI REGISTAR ADMINISTRATIVNIH POSTUPAKA U OPĆINI ILIDŽA

U Općini Ilidža 14. januara/siječnja 2015. godine zvanično je predstavljen Elektronski registar administrativnih postupaka u Općini Ilidža. Prezantaciji su prisustvovali predstavnici Svjetske banke, Razvojne agencije Kraljevine Švedske, privrednici, vijećnici Općinskog vijeća Ilidža i pomoćnici načelnika.

Elektronski registar administrativnih postupaka jedan je od rezultata Globalne prakse za poboljšanje trgovine i konkurentnosti koju provodi IFC i Grupacija Svjetske banke uz pomoć Općine Ilidža i Kraljevine Švedske.



Načelnik Memić na predavljanju registra

Općina Ilidža je u protekloj godini provela detaljnu reformu svih administrativnih postupaka, izvršeno je skraćanje rokova i koraka pri rješavanju predmeta, a sve sa ciljem povećanja konkurentnosti, smanjenja troškova i rizika poslovanja, te stvaranja uvjeta za privlačenje domaćih i stranih investicija. Uspostavljen je elektronski internet registar koji će omogućiti značajno povećanje transparentnosti i povećati pravnu sigurnost poslovanja na području općine Ilidža.

O značaju Elektronskog registra administrativnih postupaka govorili su načelnik Općine Ilidža prof. dr. Senaid Memić i koordinator projekta Haris Gudić koji je prezentirao Projekat o poboljšanju poslovnog okruženja i kvalitetnijem pružanju usluga građanima i pravnim subjektima. Lisa Kaestner regionalna menadžerica Grupacije Svjetske banke za Evropu i Centralnu Aziju ispred Globalne prakse za jačanje konkurentnosti i trgovine u svom obraćanju je čestitala načelniku i njegovom timu koji je uspio da napravi značajne pomake u stvaranju boljih uslova za poslovno okruženje i naporima kako bi projekat uspio. Direktorica Razvojne agencije Kraljevine Švedske, Marie Bergston kazala je da je Švedska vlada od 2011. godine u ove projekte uložila 19,5 miliona SEK i da će se podršku Bosni i Hercegovini nastaviti do 2020. godine sa krajnjim ciljem da pomogne ljudima u ovoj zemlji da bolje žive.

Ovim projektom Općina Ilidža je prva na području Kantona Sarajevo eliminisala namjensku saglasnost i prva koja će pribavljati potrebne dokumente po službenoj dužnosti u ime građana i tako skratila proceduru otvaranja firme.

SLUŽBA ZA PROSTORNO UREĐENJE OPĆINE ILIDŽA RIJEŠILA 1.869 UPRAVNA POSTUPKA

Općina Ilidža je putem Službe za prostorno uređenje u 2014. godini riješila 1869 upravnih postupaka. Od toga, u postupku legalizacije bespravno izgrađenih objekata riješeno je 963 zahtjeva i to naknadna urbanistička saglasnost 584, naknadno odobrenje za građenje 250, te 73 upotrebne dozvole i 53 izmjene produženja.

U 2014. godini Služba je na prijedlog načelnika pripremila, a Općinsko vijeće donijelo značajan broj planskih dokumenata i to u različitim fazama. Usvojeni su Regulatorni plan Hrasnica i Centar, nacrt RP Blažuj, RP Doglodi te donesene odluke o pristupanju i izradi RP Alipašin most, Nova Ilidža 1, 2, 3, te Urbanistički projekat Riverina-Sastavci faza A-1.

Služba za prostorno uređenje je tokom 2014. godine za određene faze planskih dokumenata, a po programu i planu rada i dostavljenog materijala od strane Zavoda za planiranje i razvoj Kantona Sarajevo, održala javne rasprave i tribine po mjesnim zajednicama. U toku 2014. godine izdato je i riješeno 538 zahtjeva za saglasnost za priključak električne energije, a po zahtjevima vlasnika objekata. U sklopu svoje nadležnosti Služba je rješavala i izdavala izvode iz planskih dokumenata, uvjerenja, saglasnosti i slično.



Matični ured Općine Ilidža izvršio provjeru podataka u matičnim knjigama za 4.806 osoba, a za biometrijsku ličnu kartu 17.209, što je povećanje za 50 posto u odnosu na 2013. godinu.



U Općini Ilidža, 30. juna 2014. godine pušten je u funkciju jedinstveni matični registar na osnovu kojeg se izvodi iz matičnih knjiga mogu izdavati i za druge općine na području Federacije BiH, što je značajno povećalo broj izdatih izvoda iz matičnih knjiga. Općina Ilidža je u 2014. izdala ukupno 26.699 izvoda i uvjerenja iz matičnih knjiga.

Također, došlo do povećanja broja upisa u matičnu knjigu rođenih i knjigu umrlih. Tako da je za prva tri mjeseca stupanja na snagu ovog zakona u matičnu knjigu rođenih upisano 346 osoba, a u matičnu knjigu umrlih 512 osoba. Do značajnog povećanja obima posla došlo je i izdavanjem biometrijskih pasoša, pri čemu je Matični ured Općine Ilidža izvršio provjeru podataka u matičnim knjigama za 4.806 osoba, a za biometrijsku ličnu kartu 17.209, što je povećanje za 50 posto u odnosu na 2013. godinu.

Kad je u pitanju ovjera potpisa, rukopisa i prepisa ovjereno je ukupno 274.876 i to 233.245 ovjera kopija i 41.631 ovjera potpisa.

U oblasti upravnog rješavanja riješeno je 1.789 predmeta koji se odnose na ispravku, dopune podataka u matičnim knjigama, naknadni upis u knjige rođenih i knjige umrlih.

NAČELNIK OPĆINE BUŽIM AGAN BUNIĆ U INTERVJU ZA NOVO VRIJEME: BUŽIM JE MNOGO DAO ZA BiH, ALI NE I DOBIO

Preuzeto sa: <http://opcina buzim.ba> Dan Općine Bužim, 20. februar, bio je povod za razgovor s načelnikom te općine koja je jedna od najmlađih općina u našoj zemlji. Agan Bunić je dužnost prvog čovjeka viteškog Bužima preuzeo prije tri godine, pobijedivši na lokalnim izborima 2012. godine

Općina Bužim i njeni građani će 20. februara proslaviti dvadeset godina od formiranja i dobijanja statusa općine. Ovaj jubilej će pratiti brojne aktivnosti nevladinog sektora, kao i mnogih udruženja koja djeluju na području općine Bužim. U intervju za Novo vrijeme, načelnik Agan Bunić govori o problemima s kojima se susreće ova lokalna zajednica, o kapitalnim projektima koje pokušavaju realizirati, projektima prekogranične saradnje te o odnosu s bh. dijasporom.



NV: Jeste li i u kojoj mjeri zadovoljni ostvarenim rezultatima u periodu u kojem ste na poziciji načelnika Općine Bužim?

Agan Bunić, načelnik Općine Bužim

Cijeneci ukupno raspoloženje građana, glas javnosti, ono što smo uspjeli uraditi u protekle dvije godine, procese koje smo otvorili u formiranju novog pogleda na najmlađu krajišku općinu, smatram da smo dobrim dijelom uspjeli i trebamo biti zadovoljni. U veoma teškim vremenima smo osvojili mandat; prazni budžeti, cijeli prošli mandat (2010-2014) bio je obilježen političkom nestabilnošću, teškom ekonomskom situacijom, prirodnim katastrofama i sličnim, sve su to faktori koji imaju značajan utjecaj na određena kretanja u lokalnim zajednicama. Ja sam zadovoljan urađenim u protekle dvije godine, ali očekujem da bi naredne dvije godine trebale biti još uspješnije.

NV: Kakav razvojni plan mogu očekivati građani Općine Bužim u narednom periodu?

Općina Bužim ima usvojenu Strategiju razvoja, po kojoj je neophodno više pažnje posvetiti privrednim aktivnostima. Jedna od aktivnosti na kojoj ne trebamo stati jeste uspostava prve poslovne zone u Varoškoj Rijeci. Za taj posao nam treba više mudrosti i odgovornosti, prije svega za osiguravanje potrebne podrške putem odluke Općinskog vijeća. Smatram da će opozicija prepoznati interes u tom zajedničkom projektu. Svi kapitalni projekti imaju veze s razvojnim planovima, od vodosnabdijevanja, zatim projekata u elektroenergetskom sektoru, izgradnje putne infrastrukture do drugih projekata u privatnom sektoru, a Općina Bužim trenutno ima aktivnosti na ovim kapitalnim projektima.

NV: Nekoliko kapitalnih projekata čeka realizaciju duže od decenije? Čemu pripisati višegodišnje zastoje u realizaciji projekata koji su od značaja za općinu Bužim?

Izgleda da je moja sudbina da započnem određene projekte, no, pojedini nisu započeti u mom mandatu i ne želim zasluge pripisivati sebi. Činjenica je da se na realizaciju i početak nekih čekalo više godina; naprimjer, izgradnja dvorane bila je predmetom priče prije otprilike desetak godina, te ćemo vrlo brzo doći i do izvođača radova na 110 kw-stanici u Bužimu, čiji je investitor Elektroprivreda BiH; dobar dio posla smo uradili i na vodovodu "Pivnice"; zaobilaznica čeka nastavak izgradnje, no, kad je riječ o tom projektu Općina je uradila svoj dio posla.



Grb Općine Bužim

"Od viših nivoa očekujemo samo da rade svoj posao, da imamo stabilne parlamentarne većine i vlade, a općina će se u normalnim uvjetima boriti za svoj dio kolača koji s pravom traži. Mi moramo dostići nivo srednje razvijenih općina, s osnovnom infrastrukturom, a poslije ćemo se takmičiti s ostalim općinama."



Stara tvrđava u Bužimu



NV: Radovi na sportskoj dvorani trebali bi početi na proljeće ove godine. Koji je razlog da se tek ove godine krene u izgradnju objekta koji je prijeka potreba velikog broja klubova koji djeluju u Bužimu?

Povodom obilježavanja 20 godina od formiranja Općine Bužim, bit će upriličen svečani čin polaganja kamena temeljca za dvoranu. Radili smo pune dvije godine da bismo došli do ovog historijskog trenutka za građane Bužima. Razlog što ranije nismo započeli radove ogleda se u nerealnim projektnim rješenjima, ambicioznim planovima i pogrešnom pristupu. Volio bih da pravimo olimpijsku dvoranu, no, smatram da nemamo potrebu za tako velikim projektima, jer je ne bismo mogli održavati, bio bi nam problem i struju plaćati. Ovim projektom ćemo, ako Bog da, doći do realnog rješenja za Bužim, njegovih 25 sportskih klubova i oko 700 učenika srednje škole koji nemaju nikakvu fiskalnu salu. Daj Bože da u dogledno vrijeme ona bude mala i da imamo potrebu graditi veću.

NV: Općina Bužim graniči s Republikom Hrvatskom, time i s Evropskom unijom. Da li i koje projekte Općina realizira u programima prekogranične saradnje?

Općina Bužim još nije imala iskustva s prekograničnom saradnjom i realizacijom takvih projekata. Međutim, to nam je realna šansa i uraditi ćemo sve da iskoristimo te mogućnosti. Već u narednom periodu, putem određenih programa i projekata, zajedno s drugim općinama, Razvojnou agencijom USK i drugim partnerima, moguće je doći do manjih projekata. Projekti iz oblasti zaštite okoliša, rješavanja oborinskih i drugih voda u saradnji s Velikom Kladušom i susjednim općinama u Republici Hrvatskoj mogu biti interesantni za EU-fondove.

NV: Općina Bužim je jedna od općina s najvećom stopom nezaposlenosti u FBiH. Na koji način planirate smanjiti nezaposlenost?

Ne znam je li s najvećom, ali jeste s visokom stopom nezaposlenosti. To je statistički problem, ali mislim da stanje na terenu nije uvijek onako kako te cifre govore. Statistički, od 2012. godine kad sam preuzeo mandat, imamo veći broj zaposlenih za oko 100 radnika, dakle imamo pozitivan trend u posljednje dvije godine. Naši ljudi se snalaze na razne načine. Naša dijaspora, posebno ovdje u Krajini, značajan je faktor ekonomskog razvoja i rješavanja brojnih problema. Drugo je pitanje koliko te mogućnosti koristimo. Država nema jasne strategije glede ovog pitanja, a lokalne zajednice nemaju nadležnosti da se suštinski njime bave, no, pokušavaju ostvariti bolji kontakt. Općina Bužim je napravila iskorak u tom pogledu, prije svega s našim zajednicama u Hrvatskoj, Sloveniji i Austriji. Mnogo je ljudi koji svoju egzistenciju rješavaju putem poljoprivredne proizvodnje, te tu nema mnogo evidentiranih zaposlenika. Naša šansa je poslovna zona, podrška postojećim privrednicima i dodatni angažman u poljoprivrednoj proizvodnji.

NV: Koje privredne grane imaju najveći potencijal na području općine Bužim i šta ona čini kako bi privukla potencijalne investitore?

Drvena industrija je naša mogućnost, u tom sektoru imamo iskustva i radne snage. Moramo uraditi sve da naš bivši "Abonos" ponovo počne s proizvodnjom u punom kapacitetu. To je bila jedna od najboljih fabrika za proizvodnju stolica na ovom prostoru, zapošljavala je oko 200 radnika. U tom sektoru imamo nekoliko uspješnih firmi koje zapošljavaju manji broj radnika i njihovi su proizvodi na evropskom tržištu. U sektoru poljoprivrede imamo veliku šansu, posebno u dijelu proizvodnje maline. Naši poljoprivrednici su pokazali da mogu imati ozbiljnu proizvodnju maline. Trebamo razmišljati o preradi naših poljoprivrednih proizvoda. Šansa je i "Saniteks" i Rudnik mangana, fabrike koje su u privatnim rukama i od vlasnika se očekuje da učine iskorak. Općina neće smetati nikome, možemo samo pomoći u okvirima svoje nadležnosti i finansijskih mogućnosti. Mi smo servis, a sve ostalo je na privatnoj inicijativi i privatnom kapitalu.

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu





NV: Kako ste zadovoljni saradnjom s višim nivoima vlasti i njihovim izdvajanjem za ovu općinu?

Viši nivoi vlasti su se u protekle četiri godine najviše bavili sobom. Od USK smo imali podršku za nekoliko projekata u oblasti voda i zaštite okoliša, a smatramo da je moglo i bolje. Izostala je podrška za izgradnju i rekonstrukciju školskih objekata, iako je to nadležnost Kantona, nije bilo mnogo investicija, a Bužim ima najveće potrebe za tim. Prave se škole tamo gdje nema djece ili ih je veoma mali broj, a tamo gdje djeca idu u tri smjene nema podrške. Vidjet ćemo hoće li nova vlast USK nastaviti s tim negativnim trendom ili će početi na stvari gledati realno, bez ikakvih političkih konotacija prema Bužimu. S nivoa Federacije je bilo više podrške, radili smo projekte vodosnabdijevanja i putne infrastrukture. Od viših nivoa očekujemo samo da rade svoj posao, da imamo stabilne parlamentarne većine i vlade, a općina će se u normalnim uvjetima boriti za svoj dio kolača koji s pravom traži. Mi moramo dostići nivo srednje razvijenih općina, s osnovnom infrastrukturom, a poslije ćemo se takmičiti s ostalim općinama. Bužim je mnogo dao za BiH, ali ne i dobio.

NV: Saradnja s dijasporom prepoznata je kao prilika koju treba iskoristiti. Kako ocjenjujete saradnju s bh. dijasporom u Evropi?

Naša dijaspora, posebno ovdje u Krajini, značajan je faktor ekonomskog razvoja i rješavanja brojnih problema. Drugo je pitanje koliko te mogućnosti koristimo. Država nema jasne strategije glede ovog pitanja, a lokalne zajednice nemaju nadležnosti da se suštinski njime bave, no, pokušavaju ostvariti bolji kontakt. Općina Bužim je napravila iskorak u tom pogledu, prije svega s našim zajednicama u Hrvatskoj, Sloveniji i Austriji. Moramo naći put do naših ljudi i u drugim zapadnoevropskim državama. Gore trebamo ići po pamet i iskustvo. Nažalost, najčešće idemo po neki vid podrške ili pomoći, nije ni to sporno, treba pomoći ljudima kojima je pomoć potrebna, ali moramo s našim ljudima razgovarati o mogućim ulaganjima u domovinu, pokretanju biznisa, vraćanju obrazovanih i iskusnih ljudi (primjer je Republika Turska), kulturnoj i nacionalnoj promociji Bošnjaka kao autohtonog evropskog naroda.



Bužim

OPĆINA SCANDICCI (ITALIJA) I OPĆINA JABLANICA ZAJEDNO U PROJEKTU "RAD JE MOJE PRAVO"



U okviru programa međunarodne saradnje Udruženja Link Mostar - nevladina organizacija COSPE Firenca (Italija), općina Scandicci iz Italije i općina Jablanica, realizuju zajednički projekat "Rad je moje pravo", a odnosi se na uključivanje u rad osoba sa invaliditetom.

Prehodni projekti saradnje u kojima je općina Jablanica učestvovala kao partner su projekti „Uspostavljanje Regionalnog poduzetničkog centra u Hercegovini“ i „Sistemi upravljanja

otpadom iz preduzeća“. Tim povodom Općinski načelnik Salem Dedić posjetio je gradonačelnika Scandicci Sandro Fallani u utorak 10. februara 2015. godine, na kojemu se razgovaralo o jačanju suradnje između dvije općine i Udruženja Link Mostar, uz podršku Regije Toskana.

"Počinjemo sa programom saradnje od danas do naredne godine," rekao je gradonačelnik Sandro Falani - „a za dugoročne projekte potrebno je vrijeme i moraju pronositi zajedničke vrijednosti, otvorenosti znanju, suživot i gostoprimstvo".

Općinski načelnik Salem Dedić ponovio je važnost ulaganja u socijalnu politiku od strane lokalnih samouprava i objasnio važnost projekta suradnje "Rad je moje pravo", „jer se tiče najhitnijih problema naše stvarnosti, nezaposlenosti i invalidnosti." Kroz projekat "Rad je moje pravo" reklamnom kampanjom, emitovanjem priloga na nacionalnoj i lokalnim televizijama podići će se svijest stanovništva sa ciljem da se osigura jednak pristup i unapređenje vještina osoba s invaliditetom. Sastanku dvojice načelnika i predstavnika Udruženja Link Mostar u Opštini Skandicci, prisustvovala su dobrovoljna udruženja gradova koje se bave invaliditetom, povjerenik za Internacionalnu suradnju Diye Ndiaye, predsjednik Gradskog vijeća Danijel Lanini i predsjednik Komisije Vijeća socijalnih usluga Giulia Bambi. Predstavnicima grada domaćina, Općinski načelnik Salem Dedić uputio je poziv za uzvratnu posjetu, koja je sa zadovoljstvom prihvaćena i očekuje se u aprilu mjesecu ove godine.



Comune di Scandicci





Grb Općine Bosanski Petrovac

OPĆINA BOSANSKI PETROVAC U IPA CBC PROJEKTU ALTERENERGY



U kabinetu načelnika Općine Bosanski Petrovac, Zlatka Hujica, održan je sastanak sa predstavnicima firme Ceteor iz Sarajeva, Nihadom Harbašem i Vedadom Suljićem, kao i predstavnikom CRP-a, Centra za razvoj i podršku, Edinom Zahirovićem.

Razgovaralo se o aktivnostima na realizaciji projekta Alterenergy, koje se očekuju, nakon izbora općine Bosanski Petrovac za učešće na strateškom IPA CBC projektu Alterenergy, održiva energija u malim zajednicama Jadrana.

Sporazum o saradnji su u Sarajevu, 10. februara, razmatrali načelnik općine i

zamjenica ministra spoljne trgovine i ekonomskih odnosa BiH, Ermina Salkićević-Dizdarević, koji će biti potpisan ovih dana. Inače, radi se o prvom strateškom projektu koji se realizira u okviru IPA Jadranskog programa prekogranične saradnje.

Projekat je usmjeren na promovisanje energetske održivosti manjih lokalnih zajednica, koja podrazumjeva korišćenje raspoloživih obnovljivih resursa za proizvodnju energije i povećanje efikasnosti u prenosu i korišćenju energije, što će kao posljedicu imati i zaštitu i unapređenje životne sredine.

KORISNI LINKOVI ZA PREDPRISTUPNE FONDove EU:

www.southeast-europe.net

www.adriaticipacbc.org

www.interregadriatico.it

www.europa.ba

www.cbib-eu.org

www.cbc.bih-mne.org

www.srb-bih.org

www.cbc-cro-bih.net

www.programmamed.eu

www.tacso.org

www.euroinfocentar.ba

www.balkanfund.org

www.eurelmed.com

www.eacea.ec.europa.eu

POTPISAN SPORAZUM O REVITALIZACIJI STARE „ĆIRINE“ PRUGE

Povodom početka realizacije projekta „Bicikliranje kroz povijest“ – revitalizacija stare uskotračne pruge „Ćiro“, 11. februar/veljača u Općini Ravno održao sastanak na kojem se prezentirao projekt, a projektni partneri potpisali memorandu o njegovoj zajedničkoj provedbi i promoviranju.

Projekt financira Europska unija u okviru programa prekogranične suradnje između Hrvatske i Bosne i Hercegovine, a provodi ga Javno poduzeće „Vjetrenica – Popovo polje“ Ravno i partneri: Regionalna razvojna agencija REDAH, Udruga za promociju biciklizma „Hercegovina Bike“, Turistička zajednica Općine Konavle, Turistička organizacija Općine Trebinje, te Općina Čapljina, Ravno i Neum.

Cilj ovoga projekta je doprinijeti integraciji gospodarstva kroz razvoj nove zajedničke turističke ponude – biciklističke staze koja će prolaziti obnovljenom starom uskotračnom prugom.



Vrijednost projekta iznosi 643.266,42 eura, od čega Europska unija financira 539.376,45 eura (296.396,47 eura za BiH i 242.979,98 eura za RH) odnosno 83,78 posto od ukupne vrijednosti projekta. Nositelji projekta i partneri sufinanciraju projekt u ukupnoj vrijednosti od 103.889,97 eura.

Trajanje projekta je 24 mjeseca, a njegovi su nositelji Javno poduzeće „Vjetrenica“ Popovo polje (Bosna i Hercegovina) i Općina Konavle (Republika Hrvatska).

Vrijednost projekta iznosi
643.266,42 eura, od čega
Europska unija financira
539.376,45 eura
(296.396,47 eura za BiH i
242.979,98 eura za RH)



PREDSTAVLJEN PROJEKT MOSLED OPĆINE ORAŠJE KOJEG FINANCIRA EUROPSKA UNIJA



Sa potpisivanja Memoranduma

ORAŠJE, 5. februar/veljača – Na uvodnoj konferenciji Održivog lokalnog ekonomskog razvoja općine Orašje (MOSLED) potpisan je Memorandum o razumijevanju i suradnji između svih partnera koji rade na implementaciji ovog projekta, navodi se na web stranici Općine Orašje.

U ime Općine Orašje Memorandum je potpisao Općinski načelnik Đuro Topić, u ime Grada Pleternica gradonačelnica Antonija Jozić, u ime Federalnog ministarstva razvoja, poduzetništva i obrta tajnik Jozo Bejić, u ime Županije Posavske direktor Ureda za gospodarstvo Franc Kljajić i u ime Udruženja za razvoj NERDA

direktor Enes Drljević.

Voditelj projekta MOSLED Mato Mikić predstavio je ovaj dvadeset šestomjesečni projekt čiji su glavni ciljevi izgradnja kanalizacijskog sustava u Poduzetničkoj zoni Dusine, opremanje i jačanje funkcije Centra za poduzetništvo i Poslovnog inkubatora općine Orašje, edukacija osoblja i promocija Poduzetničke zone kao pogodnog mjesta za ulaganje. O mogućnostima pristupa pretprijetnoj financijskoj pomoći EU na konferenciji je govorila predstavnik Direkcije za europske integracije BiH, Nevena Marilović. O primjerima dobre prakse korištenja pretprijetnih fondova EU u Bosni i Hercegovini i Republici Hrvatskoj govorili su predstavnici Udruženja za razvoj NERDA Tuzla i Poduzetničkog inkubatora „BIOS“ Osijek. Ukupna vrijednost projekta MOSLED je 461.265,93 EUR, od čega Europska unija financira 85% u iznosu od gotovo 400.000 eura iz sredstava IPA 2011, u okviru podrške lokalno-ekonomskom razvoju u Bosni i Hercegovini. Projekt provodi Općina Orašje s partnerima, Poduzetničkim centrom Pleternica i Udrugom privatnih poduzetnika Orašje, koji sufinanciraju projekt s 69.380,00 EUR (15%).



Grb Općine Orašje

PREDSTAVNICI SAUDIJSKOG FONDA NAJAVILI ODOBRAVANJE KREDITA



Saudijski fond za razvoj odobrit će Općini Stari Grad Sarajevo kreditna sredstva u iznosu od 8.062,000 dolara za realizaciju četiri razvojna projekta. Sredstva će biti odobrena već na narednoj sjednici Odbora Fonda, najavili su jučer Mohammed Aldalilan i Sulaiman Alwotaid, predstavnici Fonda kojima su prezentirani projekti izgradnje podzemne garaže i multifunkcionalnog trga u ulici Avdage Šahinagića, sportske dvorane uz OŠ "Edhem Mulabdić", nadziđivanje centralnog objekta Doma zdravlja Stari Grad i poboljšanje energetske efikasnosti

zgrade Općine Stari Grad.

Nakon prezentacije, predstavnici Fonda su sa načelnikom Ibrahimom Hadžibajrićem obišli ove četiri lokacije i detaljno se upoznali sa svim projektima.

"Oni su posebno zadovoljni što ćemo odobrenim sredstvima financirati projekte koji su od opšteg interesa za naše građane, odnosno što Općina rješava probleme građana iako bi se time trebale baviti druge, nadležne institucije. Pritom mislim na izgradnju sportske dvorane i nadogradnju Doma zdravlja," pojasnio je Hadžibajrić i dodao da bi najkasnije za dva mjeseca mogao početi izbor izvođača radova na ovim projektima. "Rekli su nam da potpisivanje ugovora o odobravanju sredstava očekujemo za nekih dva mjeseca u Rijadu, a odmah nakon toga možemo krenuti sa daljnom procedurom," dodao je Hadžibajrić.

Općina Stari Grad Sarajevo će se kod Saudijskog fonda za razvoj zadužiti na period od 20 godina, uz petogodišnji grejs period i interes od 2%.



Grb Općine Stari Grad



USPJEŠNO ZAVRŠEN CERTIFIKACIJSKI AUDIT ZA STANDARD ISO 9001:2008 U ADMINISTRACIJI OPĆINE SREBRENİK

U organima uprave Općine Srebrenik, 9. februara/veljače boravio je stručni tim certifikacijske kuće DQS – BH CERT iz Sarajeva, koji je obavio Nadzorni audit odnosno, ocijenio sistem kvalitete po standardu ISO 9001:2008. Navedeni stručni tim posjetio je sve općinske službe u svrhu provjere sistema rada i funkcionisanja kvaliteta usluga u općinskim organima uprave. Zajednička ocjena je da je Općina Srebrenik uspješno prošla i ovaj Nadzorni audit za Standard ISO 9001:2008, te je sugerisano šta treba uraditi na dodatnim poboljšanjima.



Općinski načelnik je istakao da su on, kao i svi uposlenici, svjesni neuslovnih prostora u kojima su smještene službe i uposlenici Općine, ali predložene analize pokazuju da uposlenici, bez obzira na to, ipak rade dosta kvalitetno i rezultati su bili iznad očekivanih. Useljenje u novu zgradu administracije općine Srebrenik, koje bi se trebalo desiti najkasnije do 21. juna ove godine tj. do dana općine Srebrenik, će konačno pružiti normalne uslove za rad svih službi i radnika na jednom mjestu, a građani će tada imati još bolju, profesionalniju i bržu uslugu i to sve na jednom mjestu. Inače Općina Srebrenik je kao prva općina na nivou Tuzlanskog kantona i među prvih 7 općina u BiH usvojila i sve do sada uspješno održava standard kvaliteta ISO 9001:2008.

KORISNI LINKOVI ZA PREDPRISTUPNE FONDove EU:


www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmmed.eu
www.tacso.org
www.euroinfoceantar.ba
www.balkanfund.org
www.eurelmed.com
www.eacea.ec.europa.eu

NAJAVA OBILJEŽAVANJA DANA OPĆINA ZA MJESEC MART/ OŽUJAK

- **06. mart/ožujak - Dan Općine Hadžići.** Taj dan se obilježava kao znak sjećanja na 6. mart 1996. godine, kada je izvršena reintegracija dijelova općine Hadžići koji su bili okupirani tokom agresije na Bosnu i Hercegovinu. Hadžići, Binježevo, Žunovnica, Grivići i Drozgozmetva su naselja koja su 6. marta 1996. godine predana legalnim vlastima Općine Hadžići.
- **10. mart/ožujak - Dan Općine Doboј Istok.** Tog dana 1998. godine Parlament Federacije BiH donio je odluku o osnivanju općine Doboј Istok.
- **10. mart/ožujak - Dan Općine Teočak.** Ovaj datum je izabran jer je na taj dan 1998. godine stupio na snagu Zakon o konstituisanju novih općina u FBiH.
- **12. mart/ožujak - Dan Općine Ilidža.** Naime, 12. marta 1996. godine, provodeći odredbe Dejtonskog mirovnog sporazuma, realizirana je mirna reintegracija područja općine Ilidža.
- **15. mart/ožujak - Dan Općine Dobretići.** Naime, na taj datum Parlament Federacije BiH formirao je Općinu Dobretići.



Ilidža



Teočak



Hadžići



Doboј Istok



Musala 5/1

71000 Sarajevo

Telefon: ++387 33 216 502, 209 024, 209 120

Fax: ++387 33 552 810, 216 502

E-mail: dino@sogfbih.ba

Pratite nas na:

Pratite Savez općina i gradova Federacije Bosne i Hercegovine na

YouTube

Pratite Savez općina i gradova FBiH na



facebook
Savez općina i gradova Federacije Bosne i Hercegovine

- **18. mart/ožujak - Dan Općine Fojnica.** Ovaj datum je uzet za obilježavanje Dana Općine jer se u dokumentima dubrovačkih trgovaca na taj dan 1365. godine prvi put spominje grad Fojnica.
- **18. mart/ožujak - Dan Općine Sapna.** Ovaj dan je uzet za obilježavanje Dana Općine zato što je tog dana 1998. godine održana prva sjednica Općinskog vijeća novoformirane Općine Sapna.
- **19. mart/ožujak - Dan Općine Foča-Ustikolina.**
- **20. mart/ožujak - Dan Grada Zenica.** Na taj dan 1436. godine Zenica je prvi put spomenuta u dokumentu kojim se dubrovačkim trgovcima omogućava slobodno kretanje i poslovanje na području Bosne.
- **21. mart/ožujak - Dan Općine Doboju Jug.**
- **21. mart/ožujak - Dan Općine Travnik.**



Travnik



Doboju Jug



Sapna



Fojnica



Zenica

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.